



TÍTULO IV XESTIÓN ORZAMENTARIA

V. TÍTULO IV XESTIÓN ORZAMENTARIA

CAPÍTULO ÚNICO *Dos procedementos de xestión orzamentaria*

Artigo 39º.- *Intervención limitada.*

A contía á que se refire o artigo 97.1.a) do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, queda establecida no importe fixado para ter a consideración de contratos menores de subministración na lexislación reguladora da contratación do sector público.

Artigo 40º.- *Modificacións de contratos de transporte escolar.*

Os contratos administrativos de transporte escolar poderán modificarse por razóns de interese público e para atender a causas imprevistas debidamente xustificadas, de conformidade co previsto na lei 30/2007, do 30 de outubro, de contratos do sector público.

As modificacións consistentes na variación dos percorridos así como na reestruturación dos itinerarios, motivadas por razóns técnicas, dado o carácter esencial e impostergable dos servizos de transporte escolar, poranse en práctica de xeito inmediato, unha vez comprobados o cumprimento das condicións referidas ao comezo, así como a existencia de crédito orzamentario necesario para levalas adiante.

Ditas modificacións estarán excepciónadas de informe previo da Asesoría Xurídica cando a súa contía non supere o 20% do prezo do contrato/día que se vai modificar e o importe anual que represente a modificación non supere os 18.000 €, I.V.E. excluído.

Con independencia do establecido no artigo 97.1 do texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro, non estarán sometidas a intervención previa as ditas modificacións cando non excedan dos límites sinalados no parágrafo anterior.

Malia o anterior, a Intervención Delegada da Consellería de Educación e Ordenación Universitaria comprobará, antes da fiscalización do primeiro pagamento, o cumprimento de todos os requisitos esixidos para autorizar e comprometer o gasto.

Artigo 41º.- *Fiscalización das operacións de endebedamento da comunidade autónoma.*

A intervención previa dos procedementos de contratación de operacións de endebedamento da comunidade autónoma realizarase no momento procesual inmediatamente anterior ao compromiso que se adquire coa sinatura do contrato, e comprobarase o cumprimento de todos os requisitos esixidos para aprobar e comprometer o gasto.

Artigo 42º.- *Fiscalización de nomeamentos ou de contratos para substitución de persoal.*

A fiscalización de nomeamentos e de contratos para substitucións de persoal por razóns de necesidade e de urxencia conxuntural realizarase con carácter previo á alta en nómina, mediante a verificación da adecuación do proceso de selección coa normativa vixente e da existencia de nomeamento ou de contrato, así como de crédito adecuado e suficiente.

Artigo 43º.- *Identificación dos proxectos de investimento.*

As modificacións dos programas de investimento que impliquen o inicio de novos proxectos ou a variación dos existentes requirirán a asignación dun novo código pola Dirección Xeral de Orzamentos da Consellería de Facenda, logo da tramitación da oportuna modificación polo órgano competente segundo o previsto no texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro.

Artigo 44º.- *Autorización do Consello da Xunta para a tramitación de determinados expedientes de gastos.*

Un.- Requirirá autorización por parte do Consello da Xunta a tramitación de expedientes de contratación e de encomendas de xestión cando o valor estimado ou o importe do gasto, respectivamente, sexa superior a 4.000.000 euros.

Dous.- A tramitación de expedientes que comporte a modificación de convenios que fosen previamente autorizados polo Consello da Xunta requirirá autorización do mesmo órgano. Non obstante, non será precisa esta autorización cando a modificación non supoña unha alteración do obxecto nin comporte incremento do importe total ou no número de exercicios orzamentarios, sempre que a distribución do importe correspondente a

cada exercicio respecte os límites aos que fai referencia o artigo 58.3 do texto refundido da Lei de réxime financeiro e orzamentario de Galicia, aprobado polo Decreto lexislativo 1/1999, do 7 de outubro.

Tres.- Logo de obterse a autorización, a aprobación do gasto corresponderalle ao órgano de contratación da consellaría ou da entidade instrumental do sector público autonómico que xestione o crédito.

Artigo 45°.- *Revisións de prezos contidos en concertos ou convenios.*

Con carácter xeral, as revisións de prezos que se establezan nos concertos ou convenios que subscriban durante o ano 2012 a Administración xeral da comunidade autónoma e as entidades instrumentais do sector público autonómico non poderán referenciarse por riba da evolución do índice de prezos ao consumo de Galicia. Igualmente, as revisións de prezos e tarifas que afecten a concertos ou convenios xa subscritos non poderán experimentar un incremento superior ao do IPC galego do anterior exercicio.

Excepcionalmente, por causas plenamente xustificadas ou por alteracións das condicións dos concertos ou convenios, a persoa titular da Consellería de Facenda, por proposta do departamento correspondente, poderá autorizar a inclusión de cláusulas de revisión por contía diferente á indicada no parágrafo anterior.

Artigo 46°.- *Transferencias de financiamento.*

Un.- As achegas de natureza corrente deberán librarse con carácter mensual por doceavas partes, agás que mediante convenio se regule outro réxime diferente de pagamento. Este convenio deberá someterse a informe da Intervención Xeral da comunidade autónoma sobre a adecuación do réxime de libramento proposto ao ritmo de execución do gasto corrente da entidade.

Dous.- Os convenios que se formalicen para regular o réxime de libramentos das transferencias de financiamento non precisarán de autorización previa do Consello da Xunta de Galicia.

Tres.- As achegas de capital libraranse atendendo ao ritmo de execución do gasto de capital da entidade.

Catro.- A Intervención Xeral da comunidade autónoma verificará a correcta aplicación destas achegas mediante o uso das técnicas de fiscalización e auditoría previstas no Decreto lexislativo 1/1999, do 7 de outubro, polo que se aproba o texto refundido da Lei

de réxime financeiro e orzamentario de Galicia, e nas normas que a desenvolven.

Artigo 47º.- *Subvencións nominativas.*

Un.- Non poderán incrementarse os créditos previstos nesta lei para subvencións nominativas.

Dous.- Os convenios ou resolucións nos que se estableza a concesión de subvencións nominativas regularán así mesmo o réxime de xustificación, pagamentos e anticipos que, se é o caso, se poidan librar. Estes convenios ou resolucións só necesitarán a autorización previa do Consello da Xunta cando de xeito excepcional, logo da xustificación da súa ineludible necesidade, prevexan un pagamento a conta ou ben un anticipo superior aos permitidos nos artigos 62 e 63 do Decreto 11/2009, do 8 de xaneiro, polo que se aproba o regulamento da Lei de subvencións de Galicia.

Artigo 48º.- *Simplificación da acreditación do cumprimento de obrigas coa Administración Pública da Comunidade Autónoma, coa Administración do Estado e coa Seguridade Social.*

Un.- De acordo coa posibilidade prevista na letra j) do artigo 11 do Decreto 11/2009, do 8 de xaneiro, polo que aproba o Regulamento da Lei 9/2007, de 13 de xuño, de subvencións de Galicia e para o exercicio 2012, ademais dos supostos previstos no citado artigo, poderán simplificar a acreditación do cumprimento das súas obrigas coa Administración Pública da comunidade autónoma, coa Administración do Estado e coa Seguridade Social, os beneficiarios das seguintes subvencións :

- a) As subvencións ou axudas que se concedan con cargo ao artigo 77 do orzamento de gastos, cando non superen por beneficiario/a e axuda o importe de 1.500 euros.
- b) As concedidas para a mellora da condición de financiamento que se paguen a través das entidades financeiras correspondentes.
- c) As axudas que se concedan para incentivar a contratación de seguros no sector agrario e acuícola, amparados no Plan de seguros agrarios combinados.
- d) As axudas que se concedan con carácter de compensación ou indemnizatorio.

Dous.- Quedan exceptuados da obriga de presentación de garantías que establece o artigo 67 e seguintes do Decreto 11/2009, do 8 de xaneiro, polo que se aproba o Regulamento da Lei de subvencións de Galicia, do 13 de xuño, os centros tecnolóxicos que sexan recoñecidos como tales pola consellería competente en materia de investigación, desenvolvemento e innovación.

Artigo 49º.- *Pagamento de axudas e subvencións.*

O pagamento, mediante aboamentos mensuais, das bolsas que se concedan a persoas físicas beneficiarias directas, destinadas expresamente a financiar estudos e investigación en centros públicos ou privados, poderá efectuarse de forma anticipada, con suxeición ao establecido no artigo 31.6 da Lei 9/2007, do 13 de xuño, de subvencións de Galicia.

Artigo 50º.- *Préstamos concedidos con cargo aos orzamentos xerais da comunidade autónoma.*

Un.- Sen prexuízo do análise de riscos, competencia e responsabilidade do centro xestor do gasto, será preceptivo e vinculante o informe da Consellería de Facenda para a concesión de préstamos con cargo aos créditos do capítulo VIII dos orzamentos xerais da comunidade autónoma.

O citado informe terá por obxecto determinar o efecto que as condicións de concesión dos préstamos podan ter sobre o cumprimento do obxectivo de estabilidade orzamentaria e en atención a ditas consideracións determinará a procedencia da concesión das operacións propostas.

No suposto de préstamos a conceder a través de procedementos de concorrencia, o citado informe emitirase no momento anterior á aprobación da convocatoria.

Dous.- Os beneficiarios dos préstamos deberán acreditar que se atopan ao corrente do pagamento das obrigas de reembolso de calesquera outros préstamos concedidos anteriormente con cargo aos orzamentos da comunidade autónoma.

Corresponde ao centro xestor do gasto comprobar o cumprimento destas condicións con anterioridade ao pagamento, esixindo, cando non poda acreditarse de outro xeito, unha declaración responsable do beneficiario ou certificación do órgano competente se este fose unha administración pública.

Tres.- Mediante Orde da Consellería de Facenda poderán ditarse as instrucións que sexan precisas para o cumprimento desta disposición.

Artigo 51º.- *Expedientes de dotación artística.*

Á entrada en vigor desta lei, o 80% dos créditos afectados á realización de traballos de dotación artística, nas aplicacións correspondentes a proxectos técnicos de obras no

vas do capítulo VI non financiados polo Fondo de Compensación Interterritorial nin con fondos finalistas ou procedentes da Unión Europea nin con fondos propios que co-financien, será obxecto de ampliación de crédito na Consellería de Cultura e Turismo, a conta das retencións de crédito previstas, para a finalidade determinada na Lei 12/1991, do 14 de novembro, de traballos de dotación artística nas obras públicas e nos camiños de Santiago da Comunidade Autónoma de Galicia.

A ampliación de crédito indicada terá carácter de «a conta» sobre a liquidación definitiva da porcentaxe que de acordo coa devandita Lei 12/1991 lles corresponde aos traballos de dotación artística, e non lle serán aplicables as limitacións establecidas no artigo 68 do texto refundido da Lei de réxime financeiro e orzamentario de Galicia, aprobado polo Decreto lexislativo 1/1999, do 7 de outubro, e na alínea Sete do artigo 9º desta lei.

Artigo 52º.- *Módulo económico de distribución de fondos públicos para sostemento de centros concertados.*

Un.- De acordo co establecido nos apartados segundo e terceiro do artigo 117 da Lei orgánica 2/2006, do 3 de maio, de educación, o importe do módulo económico por unidade escolar, para efectos de distribución da contía global dos fondos públicos destinados ao sostemento dos centros concertados para o ano 2012, é o fixado no anexo 4 desta lei.

Dous.- As retribucións de persoal docente terán efectividade desde o 1 de xaneiro de 2012, sen prexuízo da data na que se asinen as táboas salariais para 2012 do V convenio colectivo de empresas de ensinanza privada sostidas total ou parcialmente con fondos públicos.

As contías sinaladas para salarios de persoal docente, incluídas cargas sociais, serán aboadas directamente pola administración, mediante pagamento delegado, sen prexuízo da relación laboral entre o profesorado e o titular do centro respectivo. A distribución dos importes que integran os “gastos variables” efectuarase de acordo co establecido nas disposicións reguladoras do réxime de concertos.

A Administración só aboará as categorías funcionais directivas de director e xefe de estudos do centro, así como os trienios destas dúas categorías. Non aboará ningunha outra categoría funcional directiva e, singularmente, as denominadas xefaturas de departamento, aínda que figure expresamente recollido no convenio colectivo vixente. No ano 2012 a Administración autonómica tampouco subscribirá acordos nin ditará instrucións ou resolucións para o aboamento da paga extraordinaria por antigüidade na empresa prevista no V Convenio colectivo de empresas de ensino privado sostidas total ou parcialmente con fondos públicos, publicado por Resolución do 28 de decembro de 2006, da Dirección General de Trabajo (BOE do 7 de xaneiro de 2007).

As compoñentes do módulo destinadas a “outros gastos” e “persoal complementario” terán efectos a partir do 1 de xaneiro de 2012.

As contías correspondentes ao módulo de outros gastos aboaranse mensualmente, e os centros poden xustificar a súa aplicación ao rematar o correspondente exercicio económico de forma conxunta para tódalas ensinanzas concertadas do centro.

As contías correspondentes ao módulo de persoal complementario tamén se aboarán mensualmente, debendo xustificar os centros estes importes ao remate do exercicio económico e separadamente do módulo de outros gastos.

Tres.- Os centros que impartan os catro cursos da educación secundaria obrigatoria, serán dotados do financiamento dos servizos de orientación educativa. Esta dotación realízase sobre a base de calcular o equivalente a unha xomada completa do profesional axeitado a estas funcións, en función do número de unidades de educación secundaria obrigatoria que teña concertadas o centro e ata un máximo de vinte e cinco horas por centro. Os custos do orientador, que se incluírán na nómina de pagamento delegado do centro, serán os correspondentes ao salario, gastos variables e complemento retributivo segundo o establecido nos módulos económicos por unidade escolar do primeiro e segundo curso ou de terceiro e cuarto curso de educación secundaria obrigatoria, respectivamente.

Catro.- Facúltase ao Consello da Xunta para fixar as relacións profesor/unidade concertadas adecuadas para impartir o plan de estudos vixente en cada nivel obxecto do concerto, calculadas en base a xomadas de profesor con vinte e cinco horas semanais.

A Administración non asumirá os incrementos retributivos, as reducións horarias ou calquera outra circunstancia que conduza a superar o previsto para cada centro nos correspondentes módulos económicos, segundo o previsto no anexo 4 desta Lei.

Cinco.- A relación profesor/unidade dos centros concertados poderá ser incrementada en función do número total de profesores afectados polas medidas de recolocación que se viñesen adoptando ata o momento da entrada en vigor desta lei e se atopen na nómina de pagamento delegado.

